

江北廳志

1361  
1361  
1361

卷柒

藝文

誥勅  
疏  
傳記  
諭祭文

卷捌

藝文

記  
序  
贊  
啓  
誌銘  
詩  
詩餘



江北廳志

藝文志

同知潤田福珠朗阿纂修



訓導蔚堂宋

煊編輯

文所以載道也故曰道之顯者謂之文若尋常月露風雲之詞無關風化不足以感發人心謂之才人之詞可耳其於振衰式靡勵俗維風之意蓋有當哉古之人經世宰物本道德為文章其見諸詞華者無在不有補於人心風俗茲編所錄亦祇以事關廳屬有關風化及為巴志所採入者登其一二亦未暇以尺寸相繩故與其多收不如少取也

誥勅

明

仁宗賜少師吏部尚書蹇義勅

制曰曩朕監國之時卿以先朝舊臣擢兼詹事日侍左右時肇建兩京政務方殷隨事籌畫適中惟難卿以善翊君以義徇國勞心焦思不恤身家載歷艱虞未有咨嗟之意及朕嗣

江北廳志

卷七

藝文 誥勅

重慶中西鉛石印局代印

承大統贊襄治理用濟斯民喻朕於道不懈益恭二十餘年夷險一節朕篤不忘茲以已意創製蹇忠貞印一枚賜卿用藏於家傳之後世俾爾子孫知前人顯榮於國者良不易致宜加保守朕之子孫亦知卿弼予於艱體朕愛卿之心以保爾子孫庶幾上下相安與國咸休書曰惟后非賢不乂惟賢非后不食自古君臣相遇難矣哉往績維茂永終是圖故勅

封王鳳鳴為徵仕郎翰林院檢討勅

泰昌元年

制曰朕聞大儒之道恬以養身而智以裕後儉以取物而侈以練懷恬而智故其毅式似儉而侈故其羽可儀有美君子則亟下璽書褒之爾生員王鳳鳴乃翰林院檢討應熊之父研削宗丁章縫領袖志在用世困於逢年長孺欣託夫箕裘教勤趨鯉嗣宗欲澆其磊塊興適持螯環堵蕭然勿問蠨蛸之掛樵蘇不爨時尋脈望之塵介性似元亮畏榮謝踪公府曠韻類漢陰履坦自息鞿鞅惟爾家珍為予國寶茲封爾為徵仕郎翰林院檢討佩龍綵以炳文賁鳩筇而綏履



翰林院檢討王應熊授徵仕郎勅

制曰治堇金齊而後成鍾染羽漬而後入朕以喻學矣士出入承明將窮事變晰顯微非學何以知不足徒為詞賦君子昔人不曰著作者前烈之餘乎爾翰林院檢討王應熊德宇邃沉才鑒清遠擢自庶吉列在清班而爾四部咀英三餘惜器蒐奧渺於油素公筆削於槧鉛書舉芸臺元要襄不朽之業拔九棘院桃李成無言之蹊聲實齊蜚重遠可到茲以覃恩授爾階徵仕郎錫之勅命朕惟名碩之起詞曹若求天馬大宛之野多厥種焉而未有不由於學也惟學可以取精於古人惟問可以受益於今人學喻聚沙問喻攻木意遠哉爾尚既厥心朕且大用汝

贈王鳳鳴為中憲大夫詹事府少詹事誥天啓六年

制曰細旃書接朝資論道之英細帙庭開家有傳經之素故錫祉於教忠益篤而升華則詒穀用彰眷言矢志於講帷宜有崇褻於禰廟爾封徵仕郎翰林院檢討王鳳鳴乃日講官詹事府少詹事兼翰林院侍讀學士王應熊之父元囑廣研方聞出右淵夷而襟帶不設

江北廳志

卷七

藝文 誥勅

一一

重慶中西鉛石印局代印

弘亮而城府洞開博極羣書涵蚌珠於學海誥諸曹耦韞抵鵠於文山如此才不逢亦有司之過得全於酒處約而雅尚彌堅獲佑於天履道而考祥終吉志抗高冥之表情航老典之區禽魚自來親人堂構欣其有託色絲補袞式徵弓冶之遺五味和羹坐待釜鍾之薦茲以覃恩加贈爾為中憲大夫詹事府少詹事兼翰林院侍讀學士如子官於戲風木生悲聲香如在羽人山上鳳彩葳蕤巴子國中鶴情瀟灑尚培嘉祉於封槐益衍休光於棗葉

日講官詹事府少詹事兼翰林院侍讀學士王應熊授中憲大夫誥天啓六年

制曰朕思重道崇儒期於廣益稽古正學所以日新惟論思啓沃之臣總承明著作之任得賢人而居旃廈若礪於金循彝典以貫袞章惟言如綍爾日講官詹事府少詹事兼翰林院侍讀學士王應熊雅蘊宏才亮操端軌蚤疏庸於玉署旋人侍乎金華而爾靖共彌虔束修無斃英詞足鼓羣動品藻不失人倫值實錄之浩繁俾縮史曹而汗竹當典學之攷矻能抽緒論於橫經志業日益光明朝夕在朕左右媚茲辰告非堯舜不陳墟乃寅兢惟



夙夜匪解頃因邊遽益獻廟謨綽有霖雨舟楫之資哀然凝丞輔弼之望茲者祥開震序慶首官僚乃以覃恩授爾階中憲大夫錫之誥命於戲忠結一人之知道濟天下之溺何以基宥密之命何以收枚寧之功學有緝熙古訓益光於說命言可底績時艱恆切於疇咨不徒侈慶歷之緋衣行且資貞觀之金鏡時謂爾庸乃副朕簡欽哉

禮部尚書兼東閣大學士王應熊充經筵講官勅

崇禎七年

制曰朕惟帝王勤思三五期至治之有成先必典學就將懋緝熙於罔間朕丕承大歷寅念前修稽古準今夙宵靡敦講筵肇舉七載於茲特命太傅成國公朱純臣知經筵事爾同少傅兼太子太傅吏部尚書建極殿大學士溫體仁吳宗達禮部尚書兼東閣大學士錢士升何吾驥同知經筵事太子少保禮部尚書兼翰林院學士李康先等充經筵講官於戲講幄橫經豈止修清朝之故事金華納誨實願聞制治之良規從來理欲危微幾易淆於爭勝與夫貞邪消長辨容混於雜投以至民生國計之安危吏治邊防之得失折衷黻要雖資策畫於當幾鏡覈源流每藉權輿於古昔尙其交秉一德備殫忠謨抉前事爲後

江北廳志

卷七

藝文 誥勅

二二

重慶中西鉛石印局代印

事之師啓乃心作予心之牖使朕志皎如白日卽治理燦在目前庶收作礪之功不負爲霖之託欽哉故諭

皇清

贈段君仲振威將軍江南水陸提督勅

道光十四年

制曰宣暢國威統三軍而奏績采甄世德邇四世以推恩積慶有源流光自遠爾段君仲迺提督江南全省等處地方軍務提調水陸節制各鎮段琨之曾祖父淳心抱質善氣儲祥丕建乃家允肇弓裘於奕葉克昌厥後誕膺節鉞於高門爰賁徽章俾揚令問茲以覃恩贈爾爲振威將軍提督江南全省等處地方軍務提督水陸節制各鎮錫之誥命於戲簪纓赫奕式隆一品之殊榮綸誥輝煌用慰九原之夙志祇承寵命永播休聲

贈段祥雲爲振威將軍江南水陸提督勅

制曰嘉勞臣之偉伐遠溯家風策專閫之宏勳上推祖德舊章斯在新渥攸加爾段祥雲迺提督江南全省等處地方軍務提調水陸節制各鎮段琨之祖父善可開先教能貽穀集



軒車於里閭早知世澤之長擁節鉞於方舟聿見孫謀之裕爰頒寵爵俾荷崇裛茲以覃恩贈爾爲振威將軍提督江南全省等處地方軍務提調水陸節制各鎮錫之誥命於戲錫五色之徽章丕光令緒沛九重之濊澤益煥膚功休命其承淳風追表

贈段萬選爲振威將軍江南水陸提督勅

制曰國爵攸崇樹鷹揚之偉烈家聲光大表蛾術之良模特布新綸用彰舊德爾段萬選迺提督江南全省等處地方軍務提調水陸節制各鎮段琨之父清門代啓素履恭修教子義方早授豹韜之略傳家忠孝果符鵠印之祥慶典式逢崇階宜陟茲以覃恩贈爾爲振威將軍提督江南全省等處地方軍務提調水陸節制各鎮錫之誥命於戲顯揚克遂休茲天室徽章作述交輝展也人倫盛事令名無斁世澤長垂

封江南水陸提督段琨爲振威將軍誥

制曰提封千里資闔外之宏猷統御三軍樹師中之偉伐膚功克奏寵命宜申爾提督江南全省等處地方軍務提調水陸節制各鎮段琨知既深沉才兼恢傑夙時緩帶久宣閱閱

江北廳志

卷七

藝文 誥勅

四

重慶中西鉛石印局代印

之勞此日登壇遂受節旄之寄整威容於軍壘令肅凝霜占喜氣於戎行恩均挾纊逢斯慶典被以徽章茲以覃恩授爾爲振威將軍錫之誥命於戲賁寵酬庸已推恩於鳳誥抒忠報國尙有意於麟圖勿替乃勳祇服朕命

贈袁洙爲修職郎直隸資州資陽縣教諭勅

制曰任使需才稱職志在官之美馳驅奏效報功膺錫類之仁爾副榜袁洙乃四川直隸資州資陽縣教諭袁文明之父雅尙素風長迎善氣弓冶克勤於庭訓箕裘丕裕夫家聲茲以覃恩贈爾爲修職郎四川直隸資州資陽縣教諭錫之勅命於戲肇顯揚之盛事國典非私酬燕翼之深情臣心彌勵



諭祭文

明

諭祭吏部尚書蹇義父源斌文 永樂十年七年

皇帝遣行人雷誠諭祭尚書蹇義父源斌之靈曰惟爾性質敦厚器宇溫淳篤志好善儀式鄉閭用生賢子輔弼予治敬恭夙夜益慎益勤推恩錫爵榮及爾身方期爾優游暮景樂此太平胡乃一旦奄然遐逝雖然生死者人事之常而爾生有寵喪沒有令譽夫復何恨茲特遣人諭祭爾其不昧尚克享之

仁宗爲太子時祭封尚書蹇源斌文 永樂十年八年

皇太子遣鴻臚寺右寺丞楊善致祭於故封資政大夫吏部尚書蹇源斌之靈曰卿以忠厚淳實之質和惠寬碩之德端直廉靜之行聞於時表於人有素矣余有賢輔孜孜助以善道久於一心余朝夕所資者惟卿之子推厥所本意念良深方期卿長享祿養而訃音遽至不勝悼嘆然官封六卿年及九袞榮名盛福而子孫世昌享祀綿遠卿復何恨哉茲特

江北廳志

卷七

藝文 諭祭

五

重慶中西鉛石印局代印

遣祭以著予追念老臣之意惟靈享之

諭祭翰林院侍讀學士江朝宗文 弘治十七年

皇帝遣四川布政使司左布政諭祭於翰林院侍讀學士江朝宗曰爾以辨博之學敏達之才擢秀科甲蜚英詞苑史局著編摩之績經筵多啓沃之言暨晉秩於宮僚遂超登於翰佐屢持文柄簡別惟精載與薦章擢用伊邇乃由橫累暫投散於外司旋復原銜許歸休於故里方膺壽祉胡遽考終訃音來聞良深悼惜特復爾祿以酬往芳諭祭爾靈用慰冥漠九原不昧尚克歆承

皇清

諭祭振威將軍諡勤壯直隸提督唐倬文 道光二十年

畿輔風清講武協師中之吉將臣星掩酬庸備身後之榮展偉略於龍韜瑀戈式煥宣湛恩於鳳綽芳俎宜陳爾原任直隸提督唐倬性本知方才堪致果始執爿於闔外每拔幟於行間疊畀帑銀重加品秩隴西進勦宣威而蜀徼胥平湖北從征奏凱而楚氛並息爰



作百夫之長旋膺專守之符吉羽遞更功牌懋賞殲滑城之遺孽伏地雷轟俘回部之渠  
魁新正露布優加甄叙洊陟升階用副元戎進躋方鎮荷奇軫之駢資邀勇號以驥騰百  
戰書勳宣力重干城之寄九重召對建牙隆專閫之權正倚毗之方殷何淪徂之忽告悉  
寬舊肯良深軫懷於戲鞏鼓興思青史著疆場之績几筵用薦紫霓賁泉壤之輝靈其祇  
承歆茲芬苾

江北廳志

卷七

藝文

諭祭

六

慶重中西鉛石印局代印



傳

明

馮縉雲先生傳

王應熊 非熊樂  
破人

馮時行字當可別號縉雲重慶在宋崇寧爲恭州公恭州之南樂積人少讀書巴縣之縉雲山寺故號縉雲嘉熙間狀元及第宰通義之丹稜有惠政異績以奉禮郎赴行在所時秦檜主和議忤之者立見貶逐公召對力言和議不可信至引漢高帝分羹事爲喻帝曰朕不忍聞顰蹙而起檜乃謫時行知萬州部使者至承風旨附會抵罪由是居里社十餘年權奸死起守蓬黎今蓬溪天彭而以提點成都刑獄終焉彝堅志載公守萬州日州有舞陽侯廟公以樊噲從高祖入蜀而萬州落南非噲所至是必夷鬼假託以取血食卽日撤其祠未幾出視事見偉丈夫被甲持戟坐於公庭馮叱之掀髯而怒曰吾乃漢舞陽侯廟食千歲君見毀撤吾無所歸馮力詆其生平所爲不少憚神奄奄而滅朝奉郎推發遺雅州軍事沿邊都巡檢使蹇駒撰古城馮侯廟碑云提點成都府刑獄功事馮侯隆興元

江北廳志

卷七

藝文傳

七

重慶中西鉛石印局代印

年死其官侯有功業於時死四年名山進士衆大中合邦人之思築宮於縣之古城以俎豆侯又三年駒來守雅州考侯事之終始刻之石先是經界之禍此邦實烈方經界之令甫頒民恐懼徇朝廷之法不敢輕售其姦法既行久且翫姦民始生心爭爲僥倖之索取前日久令紛更之弊始錯出跬步之田而受倍蓰之稅連阡陌者以巧倖入輕租貧者破產業瘠溝中枕藉幾蹈湯火之酷將且十年而侯持節而來問民疾苦首得此蹙然寢食不遑卽閉閣書奏報天子乞仍其故既畫可行民懼迎曰吾今更生矣及侯死民取水哭曰我有屋廬侯焉我使我獲弛然安居其下我有田疇以耕以飽皆侯之賜雖一飯必祝大中斥七十萬錢縛屋塑侯像民歲時歌舞其水旱癘疫必以禱侯亦能爲民禍福以恐動其民而食其土自侯爲部使者經畫邊事尤縝密此邦著之令甲世守界侯所在政卓異多去思民必祠之詩曰潔樽疊分酒冽清籩豆靜嘉兮肥膾其牲坎坎擊鼓兮式和且平攜持父子兮進侯庭維廟孔嚴兮有覺其盈寢簟孔安兮維侯是寧維侯相民兮式臨爾誠爾我公田兮淡淡其盈欲暘而暘兮犇犢肆耕厲鬼驅左兮風不暴盲維侯是安兮



侯無遽征公明果敢斷足當大事居里社時授徒講道安貧淡如也文尤高古人不呼其名第目爲縉雲先生云

按先生經學皆有論著有縉雲集數十卷今大全中所引縉雲馮氏者是也

南京戶部侍郎倪禺同傳

劉道開

公諱斯蕙字爾澹別號禺同重慶衛軍籍家世業儒其先領鄉薦者二人仕皆不顯公幼而嗜學潛心帖括屬有所思至忘寢食或行市中且行且誦呼之亦不應人以書癡目之與同邑鄒公庭彥齊名學者稱爲鄒倪年二十五同鄒公聯捷登萬曆壬辰榜進士鄒入詞林而公宰楚之蒲圻縣其宰蒲也發奸摘伏敏速若神訟者有倪不解擔之謠謂不須解擔而官事已結也秩滿行取得吏部主事歷文選郎中正攝共掌六選前此未有也俄陞太常寺少卿避嫌歸養出京之日橐中僅四百金而已時公年才三十六而太公亦初滿六十里人榮之色養餘閒始博覽載籍旁探內典學爲詩文詩宗盛唐及昭代七子文法蘇長公而得其雄邁之氣下筆千言一韻數首伸腕立就然熟路不暇詳編錦不求備

江北廳志

卷七 藝文傳

八

重慶中西鉛石印局代印

亦其才捷使然也會當路有修其掌銓時郟者故里居垂二十年構巴字園於城東隅收山水之勝以自適不復憶長樂鐘聲矣天啓辛酉奢酋作亂樊龍殺巡撫據重慶公瀝疏叩闕請兵請餉擒賊恢城借箸居多事平論公授一子重慶衛世襲百戶始改軍籍爲官籍壬戌起公爲光祿寺正卿丁太公艱不果行時按蜀者河南張論公之門人重慶同知余新民剛愎而驕借公噓得太守遂極力諂附刀筆吏張燦徐文繡等弄余於鼓掌之上假收樊題目破滅數百千家郡人號爲五知府諸吏之橐橐然而余不知余之虐大播而公不知也公既悞留余以毒民公之子復倚余以行私郡人又謂之倪余同而怨聲嘖嘖衆目眈眈矣乙丑服闋乃赴闕丙辰奉差册封蜀藩復命陞南京戶部侍郎公至白門訪六朝之遺蹟尋三山之勝概名僧韻友酒椀茶鐺日吟嘯於雨花牛首閒尙書張樸魏黨也以淺資臘居公上挾勢相悟公歎曰知足不辱知止不殆盍歸乎遂上疏乞休詔以尙書服色致仕是爲天啓之丁卯歲而公花甲一周矣旣挂進賢葛巾野服遇景留題逢場作戲嘗署桃符云或行或藏幸際五朝明聖世無咎無譽偷安一壑太平人家釀美酒有



佳客至酌之期醉僧之略曉詩文者山人墨客之薄有一藝者皆容接之無少倦又營西湖精舍於治平寺右剝十方堂以養行脚禪師則破雪和尚論師則篆水老人先後駐錫焉又鑿石壁得天生井有水一泓自然不竭題曰澹泉作賦鐫壁上前建禪喜堂有池有亭肩輿日至無間風雨或共老衲談禪或與騷人劈韻或觀高陽酒徒銜杯或聽烏有先生說鬼而俗子面孔則避之唯恐不亟也然公雖雅懷好客而遇族人殊薄公子天和前室劉夫人出也當公盛時橫甚及公衰和亦稍戢矣而王氏方熾附羶者衆昔之依公與余以嚙人者又走其門天和不知時務奮臂當車積瑕累豐遂成魏其武安之禍王弟應熙曠公從孫倪大成發難赴京陳請羣不逞因而破其家囚其子逐散其僮僕於是七十有五之年狼狽幽憂抱恨以卒古人云多壽多辱不其然乎鄒公之死也先公三十餘年而又無子官止七品公有子矣多壽矣尊位矣而取而較之反有不如鄒公者造物之於人顛倒亦甚矣哉公壯貌奇異龍顏修髯赤準下垂而掩其口識者以爲趙主父之像法當餓死其不至於餓亦幸矣公歿未幾王應熙白晝見公暴得怪病而死豈子產所謂取

江北廳志

卷七 藝文傳

九

重慶中西鉛石印局代印

精多用物宏而英爽能爲厲者耶

外史開曰偉哉范文正公之義田平倪氏之禍成於王而實不起於王也農部公席溫履厚而不能贍一族子厥嗣又從而躑躅之傷心切骨需時爲難王氏因之遂行其傾覆之計語曰木必先腐也而蠹生焉信夫後之士大夫無濟貧活族之義而使同姓之人望門而歎亦足危也

贊曰司農早達際逢明聖宦海揚帆浪恬風順踐歷四朝多處少出廊廟精神煙霞氣骨象賢克家朋淫殄世景濂交貞而猶受纍鬱鬱貞松皤皤君子道在羹玄恩留劍履

按少司農禺同倪公於治平寺右建西湖社延攬名流嘯植後進社中多貯書籍許人借觀以次遞換以貧而就讀者資其膏火每月兩會課前帖括後古學一時人才多所造就會公遭禍繼以賊氛社成烏有僅存一碣立道旁公題城東巴子園聯云欲透江光堆石瘦恐遮山色放牆低可想見其高致

東閣大學士禮部尙書王非熊傳

劉道開



公姓王氏諱應熊字非熊別號春石巴縣之樂嶺青溪里人也先是萬曆中童謠云樂嶺  
一根黃葛樹北京一個沈萬三蓋公未生而黃閣已預兆矣世業農自封公鳳鳴始補邑  
諸生母顏氏生二子公其長也生於萬曆乙丑歲三月二十八日公生有異質卓犖不羣  
書過目輒成誦年十三補弟子員十六廩於庠文聲大噪兵憲福唐曹能始先生深器之  
延入衙齋授以古詩文之法公既自負其才不可一世落魄縱酒視同葦蔑如也壬子舉  
於鄉榜已發矣忽收入割去第六名而填公雖當事辨揭紛紛而終成不白之疑明年癸  
丑成進士選入詞林已未以檢討分典會試所得士多名流辛酉持節封蜀藩值奢酋之  
變僑居夷陵州賊平始竣事焉旋丁太公艱服闋陞洗馬兼司經局正字轉右諭德晉詹  
事府少詹事時魏璫方橫舉朝重足公同年霍維華上疏云廠臣加祿尙未酬功蔭爵尙  
未稱德公笑謂之曰玩年兄兩尙未字豈欲朝廷讓位與他然後滿足耶此語既出岌岌  
不自安會丁內艱歸獲免於禍懷宗登極乃起爲少宗伯癸酉冬內傳入閣辦事佐政僅  
五閱月以不由枚卜攻之者衆屢疏懇辭得旨賜馳驛歸歸則杜門卻掃自鄉先生而下

## 江北廳志

### 卷七 藝文傳

十

重慶中西鉛石印局代印

罕有被其容接者公既門庭高峻聲氣不通二三蒼頭頗挾勢橫行鄉里屏息胞弟曰應  
熙與同邑公子倪天和相軋占風望氣之徒構煽其間激成大獄倪氏傾覆殆盡輿論愈  
不能平癸未秋宜興罷相舉公自代有詔起用及公至京師而宜興已賜死矣陳井研不  
欲公來給公姑止涿鹿而上疏力辭疏再上帝問井研曰應熊既來矣復上辭本何也對  
曰此無他要君之術耳帝怒遂拒以不見住朝房四十日乃允其歸公由金陵折走江西  
未入蜀境而甲申之變已作矣弘光立詔拜公爲督師專辦蜀寇公抵遵義府時獻賊已  
據成都川東無主隘將曾英擁衆數萬札重慶公雖名爲督師而實無師可督惟兢兢以  
慎名器嚴濫冒爲主蟒衣玉帶端坐受拜而已丙戌冬獻賊燒成都走

本朝肅王誅之於南部之鳳凰山餘黨孫可旺仍奔重慶墮其城南入滇黔丁亥秋公卒於  
永寧之土城公雖時值難爲受命無功然其盛名宿望猶能彈壓驕弁矜式百寮使不至  
於甚肆自公歿後則分門立戶僭爵稱尊侯伯成羣掛印接踵武皆都督文盡撫臺小生  
後進亦稱閣部而臨戎刀筆雜流至薄監司而不屑權柄不一攻殺相尋而蜀事遂大壞



莫支矣公天才超軼世智絕倫但科名唾手既少師友之薰陶宦海順風未經困衡以磨練不免任性成驕率意長傲氣凌其上意蔑其下在朝而朝論不予處鄉而鄉情不洽然而清潔好修事事以古人自命實非時流所及也公生平無書不讀爲文章能化腐爲新奪胎換骨而尺牘更爲妙絕詩亦步趨石倉陳言務去蓋吾渝久錮七子之學至公而始知有性靈真境也可謂一代之奇人特出之閒氣矣

外史開曰非熊公博雅能文孤介有守當其壁立萬仞雖子弟不敢干以私若使之典著作之任潤色皇猷操銓衡之柄砥柱倖濫庶幾其選乎遭時多艱身都將相而名實先後之際反有不滿於人者嗚呼荷非常之寄而有非常之才係天下安危享人間福壽自裴中立而外有幾人哉

贊曰立朝子子居鄉赫赫峻整方嚴夏日冬雪天資誠美聖學未充責人無已居已不宏仗鉞秉旄入相出將遇非其時用違其量民之焦墊其何能淑翰林有餘宰相不足

皇清

# 江北廳志

## 卷七 藝文傳

十一

重慶中西鉛石印局代印

潮州知府鶴坪龍爲霖傳

此採錦里新編與周開豐所作行狀稍異

龍爲霖字雨蒼號鶴坪江北居仁壩人少以才名五官並用康熙丙戌年十七成進士聲噪藝林既隸力於典墳邱索之書天文地理諸子百家靡不究心壬寅謁銓得雲南太和令太和大理首邑民夷雜處宿號難治公鞫訟不尙刑威案無留牘民自以爲不冤後值西藏軍興羽檄旁午公應付錯置悉合機宜大軍凱旋一路桀驚難調者過太和皆歡然交贊以去時縣有奸僧所爲多不法而挾武弁勢捕之匿不出公執法不移居間者無所用其巧提臺郝公以此亦贊公有膽識遂注意於公矣初太和舊例丁糧分納有田已迭賣而丁名不除且遷徙別地者追呼杖比冤苦備至而曰土尤劇浮糧至千數貽累迨百年公廉得其故爲之請命上臺以成例難之再三申請至欲以官任其罰上臺鑒其誠遂爲

題免凡通省有是弊者查確概予豁除則惠之所被者不亦廣乎雍正四年大中丞江陰楊文定特薦蒙



世宗憲皇帝召見問滇省吏治之賢否民情之休戚又問父母兄弟聲譽不倦如家人父子公

一一奏對條理明晰

上大悅俾回任候陞頃之擢受石屏州是時公行李方在途而

寵命已至滇人皆以爲異數石屏文人仕宦甲於他邦居城內者士大夫八九而民寥寥每逢公事民不堪命公爲之委曲調劑均其徭役士大夫皆樂從又城垣傾圯且無兵防守公詳請增設戍守兼指陳利害使士民共修城垣衆心開悟或出力或捐貲功速成屹然保障州有土自立勳者父子三人以狡黠雄夷中嘗隨官軍効力得給千總筭遂有鷗張之勢公知其將來必爲州患密請飭革以剪其翼未幾遂有魯魁之變繼之以茶山猺夷跳梁立勳父子誘之攻劫他邑多被殘破而石屏城堅有兵不可動賊引去士民咸免覆巢之慘然後知公賜之洪且服其先幾之哲也會提臺郝公節制兩廣奏請以公行因見求終養並聲言蜀粵雖遙舟楫相通迎養殊便

制報可遂奉母於雍正八年正月啓行連舟出峽遵長江泛洞庭徑由衡陽指桂海三月杪

江北廳志

卷七 藝文 傳

十一

重慶中西鉛石印局代印

乃抵肇慶攝司馬事踰年調潮州府丞俄遷潮州守剔弊釐奸興道設教十一城官吏豪強屏息斂手先是潮之韓江水自大埔三河而下勢若建瓴北門當其衝長受水患古作樟山隄以禦之歲久多圯田廬淹沒公爲修築水循故道民乃復業郡有大憝曰余貌陳阿蘭扇誘無賴黨羽蟠結不軌之謀久蓄公察其奸而制府鄂公亦密札相屬因重賞買線潛往迹之久之其人密稟清明節俗者祭掃貌等必出奠祖塋貌好酒飲必大醉可以擒獲公乃密會營員各選兵役繞道出城而不告以故漸近貌墳衆皆失色以忠義順逆激勵衆咸奮勇直前貌等無備乃酣醉雖逞凶迎鬪警然就擒其黨鳥獸散星夜解省正法而脅從請分別從寬數十年積癰不動聲色一朝潰之官民遂獲安枕又捕凶惡林正千抵於法此二役也卽比鄰郡縣亦陰受其庇焉潮郡東門浮梁渡江里餘三峯平列如筆格是爲韓山中峯之麓爲文公祠祠左下里許有陸丞相秀夫祠祠左有廢垣茅屋乞子所居僅存門榜曰昌黎書院公一日過之輒往觀愀然心動遂決策興復乃核贖緩稽公費進海陽令龔封五而授之圖於是鳩工選材卜日營建前爲重門題曰韓山書院升



階爲講堂後有樓樓左右爲山長居迤左一帶爲諸生習業所用物咸備其後左沙蜿蜒隆起回抱院地於上建魁星之閣再進立乞佩亭大門前有巨池以亭憑之乃徵十一屬之秀者而受業焉延海陽進士翁海莊彭澤教諭杜肯亭爲之師每月課必率郡同寮及海陽令親往暇則獨造進諸生爲之講貫學士數十人月給膏火課試卷酒食前列有旌賞有開風來學者徧鄰封之士學舍至不能容於陸祠增修一時聲播全粵上臺聞而深嘉之各製榜聯以標其盛而士之蒸蒸起者詞林如饒平詹君肯構部郎如程鄉藍君欽奎進士如海陽梁君作則蔡君躍謝君升庸莫不聯翩迭上也而公母思歸甚切公送至會城面懇列憲求侍歸養制府鄂公中丞楊公觀風使焦公咸委官勉留乃議先送潘輿旋里而留公治潮此雍正十年冬事越二年大埔令楊麒生以貪污被揭革職公中蜚語去官恭逢

### 高宗純皇帝御極蒙

召見起用仍堅請終養吏部爲之說堂始得請遂星馳還渝備極孝思家居二十年與知已

## 江北廳志

### 卷七

#### 藝文傳

十三

重慶中西鉛石印局代印

數晨夕結詩社極詩酒唱酬之樂所著有蔭松堂詩集讀史管見行世而精心獨詣者尤在本韻一書以五音七均參人韻理並通其郵於變徵而十二律間律循環相生相通不相通之處繪圖立說分別入微使三代以上之音粲然復明其旨洵暗室一燈也韻學自周容沈約定爲四聲後隋唐及宋作者用之相沿不廢鄭漁仲吳才老楊升庵之徒窺見其謬多所救正近日顏亭林毛西河邵子湘亦博加考證均有所見究不能洞悉其原兩蒼一洗而空之獨據已見考據精詳誠韻學家指南工書法草學二王眞行學魯公時或游弋於虞歐顛素之間而指書尤絕詣所謂才大無所不兼也享年七十歲葬於江北義里之居仁壩

### 李婦毛少君傳

翰林院 翟 槐

少君余友雲亭明府之長女也有至性少許江北李氏子年十八歸焉不數月李氏子疾少君侍湯藥衣不解帶嘗禱於天願以身代無何李氏子疾不起少君哭之甚誓不欲生舅姑諭之曰俟吾他兒有生子者汝可撫之以爲後徒死重傷吾二人心何爲也願汝爲



吾家孝婦少君念舅姑在堂婦事未終不可以逝乃不復存徇喪意未幾李氏子之長兄果生子舅姑以歸之少君加意撫養視如己出今年已十四矣方少君遭夫喪母王孺人以瘡癯弱女不獲所天念之不置遂得疾少君聞之告於舅姑歸視母而母支離床褥少君見之泣下母亦泣母見女而哀益不勝也于是疾勢日劇少君仰天大慟曰使吾母念我而至此吾何不早從亡者於地下以絕我母痛也有間少君避母入深室持利刀直剗其股雜湯以進血流至足不知也時少君嫂姒知其事見其姑之茹湯而疾減也爭割股繼以湯進而王孺人之疾亦竟漸痊矣嫂姒者一爲張女一許女孺人疾既愈不知其女與媳之呼天祈禱思所以救之者之至於毀骨殘股而不顧也逾旬少君乃辭歸李氏而少君之姑又病矣病復劇屢投藥無驗少君念向所以事吾母者今不以事吾姑是忍于吾姑之不救孝婦之謂何且吾將來何以見其子某於地下哉一夕奉湯以進姑食之稍頃頓覺其病之瘳也姑喜少君亦喜而豈知藥鑪之間血流于地而刀委于傍則少君之割其股者又如昔矣贊曰孝女孝婦古未有以一身兼之者吾聞貞節者性多烈少君事

李氏子不數月夫亡而守志不回吾有以知其節也宜其性之過烈至於兩割其股而無難卒以成其孝也或曰是近於傷生好名者爲之君子不取焉夫惟不畏死而乃爲偉人古今喪節辱行不爲有道所齒者皆其巽輒畏惹過於貪生而不自惜其名者也若少君者他日傳諸史氏其以爲貞孝也可



疏

明

保蜀援黔疏

南京戶部侍郎 倪斯蕙 浙江人

爲蜀局將結黔事再壞勢必借蜀援黔究且因黔憊蜀情自切於同室計必籌於萬全敬  
抒一得以佐末議以保西南半壁事蓋今中外知邊事之爲急不知黔事之爲急也知黔  
事不知黔事卽爲蜀事也惟借蜀而後可以援黔惟保黔而後可以安蜀黔一日未得了  
局蜀一日未得息肩是黔蜀竟相終始天下安危實繫於此臣蜀人也生長重慶奢酋之  
變酷罹其禍三疏叫閭報變善後請餉詳具列欵荷蒙聖恩俞允下部議覆多所採擇謂  
宜數月之間卽可蕩平不虞淹至四年師益老財益匱人心益惴惴不安而黔師又報潰  
矣臣自己酉得請假養親比今十七年矣辛酉二月蒙恩起補原官尋值奢酋之變本省  
按臣題臣蒙難不屈伏荷聖旨憫臣家難奉部檄催臣上任屬臣父驚悸成病出城四閱  
月物故至去冬十月始服闋會黔中又以敗聞臣在梓里聞見最眞恨不插翼飛入春明

江北廳志

卷七

藝文疏

十五

重慶中西鉛石印局代印

一爲皇上紓此西顧憂行至河南地方偶感風寒延淇縣醫李尙文調治尙無起色萬一  
臣疾未瘳蓋焉朝露則臣之一念杞憂藎謀終未得盡吐於皇上也因不避愚賤敢再披  
瀝蓋自奢酋煽亂全蜀震動仰仗皇上威靈督撫按道諸臣相機戰守設奇制勝亦旣解  
成都復重慶收四十七郡縣恢復永寧掃蕩蘭州纍纍獻俘闕廷挈玉壘金躔之舊還之  
陛下蜀事儘已了局蜀人從此安枕謂宜乘勝席捲一掃欃槍乃奢酋尙魚遊於釜底安  
賊猶虎峙於牂牁芒部鎮雄諸夷且欲規漁利於鷓蚌奢借安爲負嵎安以奢爲奇貨紐  
合一團結成三窟我師進則彼故退以誘我之入我師退則彼故進以躡我之後我師不  
進不退故彼兩持觀望以老我之師彼爲其主我爲其客彼以逸待勞我以勞就逸彼合  
一心以禦我我分兩省以禦彼况巖洞箐林旣難長驅直搗而重趸不毛千里餽餉又三  
十鍾不能致一石荷戈者難於枵腹當事者勇於成功往往輒墮賊計自取灭亡以朝廷  
數百萬金錢全省數百萬民命止供衆兵一走非葬魚腹則填虎口令賈生在當何如痛  
哭流涕臣竊謂此一事也變之方起似難而或易及事之旣久似易而實難蓋彼時賊勢



方張人心奮勇切不共戴天之仇有封狼居胥之意恨不賈勇先登滅此朝食如人之初病六脈俱沉疾勢正劇人子急於求醫術士療治恐後比今病已休囚人臥牀簀人子之心已竭醫家之術漸窮雖有俞跗倉公其將何以措手耶且蜀自奢酋之後大半消耗氣息奄奄旁有臥病呻吟者不忍坐視復欲策杖羸力疾往救人未救而我益病此兩弊之道也在蜀以援黔而兼討賊在黔以殲水而兼驅蘭必欲救黔先固蜀必欲固蜀當重爲黔計昔我太祖高皇帝之征東川勅諭傅友德曰東川芒部水西諸夷聚夥無事則互爭有事則相援昔閣羅鳳亡居大理唐兵追捕道出夷地聚集凶醜偶以不備喪師又曰夷地險峻崎嶇大兵一至竄入林藪猝難捕獲宜駐兵屯種待以歲月而後可圖焜煌王言非蜀事之明鑑哉今內帑既不敢頻請民間又不能再派惟有太祖屯種之法在然事無專責終屬築舍或特屬一道專管屯田而地方遼闊難以逐一履畝各府原設有軍屯同知應擇任廉能二員畫地而田計畝而耕土民降夷一體分授庶無事則守有事則戰久之屯農漸慣習戰則防兵亦可漸撤趙充國之困先零計不越此則屯田不可不講也又

## 江北廳志

### 卷七

藝文疏

十六

重慶中西鉛石印局代印

考太祖皇帝征建昌也藍玉奏四川地曠山險控扼西番蠻夷梗化欲多置軍衛籍民爲軍上曰連年供輸煩擾兵久在外不宜重勞但養銳蓄威徐議後舉夫以太祖之神武國初之物力傳藍諸將之驍傑猶斤斤其慎如此兵法百里而趨利者蹶上將今日之事豈宜輕試深入再蹈覆轍哉只宜行閒諸苗以攜其黨厚積戎餉以待其困多方綢繆以固其圍如太祖所謂徐議後舉者是也况敗師之後神氣便難猝振大兵便難驟集必須需以日月持以鎮靜發以沉毅而後萬舉萬當一戰卽捷則進兵不可不慎也漢臣諸葛亮初平蜀南曰若留外人則當留兵兵留則無所食一不易也蠻初傷破父兄死喪留外人而無兵則必貽患二不易也蠻屢有廢殺之罪自嫌蠻重若留外人終不相信三不易也今吾欲使不留兵不運餉而綱紀粗安有味平漢臣之言其今日平蜀之第一義乎業已復永寧收蘭州則此一塊土作何防守作何安插則區畫不可不周也昔播事之初七姓交攻有內叛而無外援今永蘭之變各夷糾結有外援而無內叛計非設問懸賞便難遽得要領督臣苦心區畫數年於此具有成效賞信罰必惟在朝廷益申飭之諸土司有能



擒安奢二酋以獻者卽以其土地與之若懷觀望尙持兩可有罪無赦則賞罰不可不信也蜀兵所稱慄悍勅卒惟南岸白桿子耳乃南岸之兵原不滿萬今日招去而逃明日逃回而招總之此兵往還道路希冒糧餉甚之游手亡命之徒手不能挽弓身不能擐甲虛冒南岸補充兵數每見管兵之官經過渝城臨時招募或雇倩應點隨卽散去見賊而逃者皆此輩也則兵之真僞數之虛實不可不覈也孫吳將兵卽婦人宮嬪皆可爲戰如依臣曩疏責有司處處團練鄉兵人可爲兵家可爲壘比今四年久卽未必能摧鋒陷陣亦可扼要守陴乃一聞報警遂行募兵旣挾驕蹇以微重餉又姿咆哮以噉道路地方豈乏兵特訓之無人練之無法以故往往仰給於土司耳如叙州瀘合遵桐綦江各官設兵防守誠申飭鄉兵卽以此爲有司殿最不惟可以防奢酋之逸亦可以折驕兵之氣而壯地方之膽則鄉兵不可不練也臣尤有請者往在銓部時其時河工正亟地方官員皆註停推陞至今猶記之昔官重久任謂不宜以迎送頻頻擾累百姓况今殘破之後坐未煖席事無成績又以他徙去接管不一推諉易生何以專責成而奏成功乎謂宜仿昔年治河

## 江北廳志

### 卷七 藝文 疏

十七

慶重中西鉛石印局代印

例一切俱停推陞只待平變後按功陞擢破其常調卽開府京堂亦不愛焉庶事有責成官無卸擔何難殲此蠻類則久任之責不可不議也此內外諸臣或言之已悉豈敢再勦陳言輒瀆天聽惟是傷弓之鳥計切維桑乃鳴不擇音之時也顧方伏枕旅次日理藥裹若待臣入奏痊可無期故敢輒爲臚列如以臣言不謬伏惟聖明兪允下部採擇施行地方幸甚

#### 募修藏經閣疏

龍爲霖

少時讀梅宛陵詩云從來勝絕不離俗未有幽深不屬僧心竊疑之已而周遊四方所見山川奇勝景物清幽大半皆禪房僧院始信其言之不誣又怪造物者何獨厚彼緇流乃以有用置無用及考古蹟湮沒或文人學士鴻章椽筆歲久散亡猶多古寺殘碑流傳徵信而士君子車塵馬足之倦偶從憩息亦足靜煩囂娛心志往往清詞雅韻半出其中又始嘆造物之巧於布置爲不可淺測也渝郡形勝雄傑冠巴蜀而比戶鱗集雜沓獨二三梵宮頗擅幽致藏經閣尤首屈一指焉環古刹帶清池徑從石罅中入自唐以來殿閣崔



巍迥出塵表又有禪藻亭寶素亭諸勝藏古遺蹟如宋蘇東坡明楊升菴諸鄉先生及宦游過此者石刻咸在焉非所謂幽深勝絕者歟郡守李公擇閣旁隙地創立書院俾多士肄業其中亦愛其地僻景幽爲可以藏修遊息也僧某以殿宇漸就頽敝寶素諸勝久廢無存獨其遺碑林立深懼苔蝕風饜數百年故物後將剝落湮滅重爲伊咎亟謀募化意在復古雖竭頂踵無敢告瘁豈亦有超然離俗之想歟余惟書院在閣旁如人共室而居氣象盛衰相爲表裏今僧慨然有志修護古蹟倘十方檀越不吝布施俾其煥然一新諸先達遺刻永垂莫墜未必非書院之一助卽四方騷人墨客訪勝來遊將發舒胸臆流連咏歌更復何極又安知非造物者之巧於布置詎獨有補於緇流也哉爰走筆而爲之疏



記

宋

修成都府學碑記

紹興馮時行當可江  
北人

紹興二十八年冬天子命中書舍人鄱陽王公出鎮全蜀明年四月至成都下車謁孔子廟顧見學宮圯毀不治喟然而嘆且言皇上撥亂反正易干戈爲俎豆開立政化純用儒術常以萬幾餘閒手抄六經論語孝經孟子戰國樂毅晉羊祜列傳及圖孔子與門弟子七十二人像躬爲序贊頌之郡國藏之學宮以示惇勸以率斯文德至渥也成都西南大府當是時學校薦祭無位肄業無所其何以仰承聖明休德亟命度材計工涓吉肇事力不民役費不民取易腐敗而新之與新作而補其闕凡四百楹皆宏敞靚深精堅嚴賁公來視成諸生東自荊夔西極梁牂全集廡下歡喜鼓舞咸願記載傳之將來公以命其屬部沈黎守吏縉雲馮某俾叙其興作之由且繫以辭公名剛中字時亨其治蜀純用儒術其有得於經術者豈第樂易之政無愧於前人詞曰楹楠於山魚龍於函物生有元彬彬

江北廳志

卷七

藝文 碑記

十九

重慶中西鉛石印局代印

學宮蓄儲其中登爲卿公聖神宅尊滌除妖氛煥以堯文夏校周庠達於四方聲教洋洋皇曰岷蜀詩書之俗誰歟其屬振其殫竭孕其俊傑鑿予近列西南巨屏綿絡參井惟公是命皇曰往哉惟撫惟懷實惟汝諧漢有文翁千載吏宗汝惟其同公拜於庭皇亟其行虎熊旗旌公來祁祁致其肅祇先聖先師瞻顧頽傾心經目營亟命鼎新刊山浮川巨桴雲連徒旅闐闐已卯仲冬日且昏中涓吉肅工于趾俱升趨之烝烝各奮而登翔然其成煥然其明杳然其深公其省諸邦人從之岌岌嶷嶷公升其堂而色而康喜言孔揚諄複誨語如父如母邦人鼓舞歡傳萬口父兄師友更相進誘一日二日化行洋溢如風之疾惟皇作極貴儒尙德百王之式惟公之賢受命於藩皇極遐宣幹旋樞機皇曰來歸蜀人其思樂石峨峨矢詩不多千古不磨謹記

明

蹇忠定承恩堂記

大學楊溥宏濟石  
士首人

皇上嗣登大寶嘉念蒼生期底雍熙圖任老成人彌綸治化少師吏部尙書蹇公義實爲之



冠宣德七年秋詔有司略曰予有輔臣粵自先朝偉著德望暨於今啓沃居多予於庶政咨焉予於庶官審焉克允克諧實惟其人欲新厥居以稱予優禮之意其繪圖以進明日有司以圖進弗稱又明日爲圖進弗稱上乃自規畫授有司乃卜地於都城東南厥位惟陽厥土惟剛揀材於肆厥木惟良厥石惟貞陶瓴惟堅乃卜日之吉鳩工並作哀高以平築虛以實引繩縮版以垣厥周乃建厥堂翼之以室乃闢厥路重之以門甃之甃之塗之沐之不踰月告成祀先有廟禮賓有館庖有厨汲有井有庫有廐以儲以收輪奐成美百用俱備復命大臣燕飲以落之殺核酒醴咸出大官公謂翰林學士楊溥曰昔晉獻文子成室諸大夫落焉當時善頌善禱者見稱於君子子何以語我溥不敢以不敏辭乃酌而祝曰惟天佑國家乃賁以賢哲簡俾平格復錫以壽若周之畢公策名文武之世相成王相康王永光周室公歷四朝進位師保享高年輔聖天子丕隆太平之運溥於斯爲國家賀又酌而祝曰明盛之世惠歸之德君子享多福而民咸樂其樂是以錫馬蕃庶晝日三接乃惟康溥於此爲天下蒼生賀又酌而祝曰福善之報惟有德於民者爲盛古昔名臣

江北廳志

卷七 藝文記

二十一

重慶中西鉛石印局代印

輔君致治實功允德孚達神明身被光榮澤流子孫與國同久詩曰惟其有之是以似之溥於斯爲公賀公酌而復曰聖天子之恩篤不敢忘子亦可謂善頌者矣謹名其堂曰承恩堂請書此以爲記

蹇忠定退思齋記

黃淮

少保吏部尙書蹇公名其燕休之所曰退思以予舊嘗同在外制相知爲深而以記見屬今之爲軒閣齋室者往往輒託於雲山泉石華竹禽魚公獨以退思爲名其度越於人遠矣夫天下事物之理至著之中而有至微者存况夫是非得失屈伸取舍千變萬化所以困心而衡慮者非思莫能究其極而適於中思而謂之退者進非不思也特退而紬繹省察加致其詳云耳譬諸水鑑演漾蕩激則鑑多失其真待其波靜水止而鑑焉則妍媸具見故進而思不若退思之爲得也且世人之品類不同而所思不能無異農之思易田疇工之思利器用賈之思較贏縮輒便巧以求逞其欲而已士君子立身行道其所思宜何如哉然仕有大小而所思不出其位猶農工商之不相爲謀宰執大臣以身任天下之重



其所思則志其大而略其細緩其末而急其本是故禹思天下有溺猶已溺之稷思天下有饑猶已饑之伊尹思致君爲堯舜之君致民爲堯舜之民周公思兼三王以施四事其有不合者仰而思之坐以待旦見於傳記者彰彰如是少保公之退而思者同乎否乎公爲人寬厚和平沉靜寡欲言動有常度歷事太祖太宗垂四十年人無間言今上皇帝倚任益隆決大義臨大政不動聲色而人服信能以禹稷伊周爲心者矣或曰公之退思云者取退思補過之義子言博而不切何居曰然予所論皆公職分當爲之事方今朝廷清明海宇寧謐聖天子旣以二帝三王爲已任而爲大臣者又以禹稷伊周自期由是禮樂彰而法度振道德仁義之澤洋溢乎四表不惟無過之可補以求底於無思無爲而後已顧不偉歟拳拳愚忠蓋有望焉是爲記

西南平播碑記

太子太保 兵部尚書 達 理 郡人

皇帝聖神文武輯寧宇內華夏蠻貊罔不率俾獨蜀徼播賊楊應龍憑險負固輒縱部落屠劫我邊畝直指王公趙公先後以疏聞上一再聽督撫諸臣相機撫處舞干敷德不欲

江北廳志

卷七

藝文 碑記

二十一

重慶中西鉛石印局代印

遽勤兵也賊愈恣叛逆飛練之役敢格殺我戰士且及材官矣諫議張公以疏請上西顧宵衣謂今御史大夫兼右司馬長垣李公故以中丞撫邊屢奏膚功特允廷推起於家以少司馬兼大中丞總督四川湖廣貴州軍務公以己亥年六月初十日兼程臨成都賊再屠綦江城參將房嘉寵故遊擊張良賢死之公督藩臬諸大夫亟議所以足兵足餉之策疏請速剿尋直指崔公按蜀疏奏一如公議上悉嘉納聽公便宜行事大學士趙公沈公協襄宸斷大司馬田公蚤決訐謨大司農陳公預發兵餉太宰李公御史大夫溫公掄材紆畫蓋自九列而下無不念明主宵旰冀西土廓清者公乃以計緩賊迄所徵漢土兵雲集公分蜀黔楚進兵爲八路四川以綦江路屬總兵官劉綰合江路屬總兵官吳廣永寧路屬原任副總兵官曹希彬南川路屬聽用總兵官馬孔英以參政張君棟護綦南謝君詔護永合軍事參政張君文耀參議劉君一相副使史君旌賢僉事徐君仲佳督餉兼紀功總餉兵於成都則左布政使前程君正誼今盛君世承按察使沈君季文紀功於渝則參政王君嘉謨副使傅君良諫督餉永合則參議熊君寧奇若渝守傅君光宅分理四路



餉兵推官高折枝並贊理南川路監紀之事其黔楚二鎮則貴州烏江沙溪平越爲三路屬總兵官李應祥以按察使楊君寅秋參議張君存意護軍事督餉兼紀功則以參政郭君廷良副使洪君澄源尤君錫類參議梅君國樓湖廣偏橋爲一路屬總兵官陳璘以按察使胡君桂芳參議魏君養蒙護軍事督餉兼紀功則以參政張君啓東副使王君應麟路君雲龍陳君與相蓋中丞郭公支公並以咨會受公成焉公以十二月二十三日移鎮重慶庚子正月十五日奉賜劍登壇而盟曰皇帝閔西南赤子爲播賊所荼毒無寧歲所委任責成者甚重若等昂哉其一乃心力以相予恭行天罰否則三尺具在不敢私以至辱臣死自盟諸將士聞之無不感動愿爲公盡力者公又熟計征播王殲渠魁而海龍圍夙稱天險逆賊謂此圍不可升必據圍以緩須臾之死必諸將集圍下乃可協擒而楠木山羊簡臺等洞爲遁逃淵藪婁山崖門桑木等關爲逆賊門戶方擁悍苗以死守非有先入關者何以鼓衆志而速成功此其責在蜀將湖廣偏橋內外俱九股苗遺種賊恃爲外援內四牌不掃卽三渡未易窺無由抵海龍圍貴州夷狡而兵寡兼苦軍興又水西與

## 江北廳志

### 卷七

藝文

碑記

一二十一

重慶中西鉛石印局代印

逆賊世依唇齒必操縱在我始足以折安酋而奪逆賊之氣是又楚黔諸將之責因進紆及廣等檄璘及應祥等授以碩畫郭公支公並以機宜示黔楚諸將奉約惟謹以二月十二日遵令進兵總計八路漢土及燕趙越粵秦汴滇南馬步卒二十餘萬督餉張君等焦思蒿目曾不後時師行糧從戰士踴躍故鷹揚虎賁朱戈漆甲並盪摩朗耀於巴渝黔楚閒焉一切零賊諸路日多斬獲其自縛請降者悉受而生全之二月十四日紆督兵攻楠木山羊簡臺等洞破之迨朝棟率諸苗衝營紆復督勁兵大破之而桑木關山險箐深仰攻爲難折枝祇奉公檄身先參將周國柱等前已大敗賊於官壩營望草壩遂乘勝衝關之左右兼擣其中以三月初八日破桑木關適孔英至自關中又敗賊於金子壩蓋南川路視諸將先登入關二十九日紆亦破婁山關矣四月初一日廣兵薄崖門郭通緒者敢戰當關廣伏兵攢槩刺之以初四日破崖門關再力戰於水牛塘因據主圓山山倚海龍圍高圍數十仞賊所恃爲左右望者部苗萬餘列柵堅守廣督希彬等奪以勁兵而綦南二路仍各發兵三千助之遂據此山之上俯視圍中樵汲從此斷絕而南川路衝其前鋒



綦江路爲左右翼擊賊永合二路併攻復連破養馬養雞等城海門龍鳳等關賊不復敢格鬪灑淚率妻子夜退棲囤上以鐵鑄關爲守囤倚諸崇山又鬼方多淫雨白日晦冥兵將集囤外未敢先發先是崔公甫臨成都卽移檄諸將不許干後時之誅公慮蜀四路各自爲心檄按察張君悌糾合諸將縉及廣等督兵夾攻鐵鑄關破之雖賊黨已奔潰而囤前重岡複嶺較囤後尤甚賊日夜守以梟鷲藏礮伏弩俯瞰我兵紛擊之如雨以是將兵盡銳仰攻尙未遽克適公聞先大夫艱又慮諸將解體收淚草檄刻期破囤且懸重賞激先登者并檄責廣充爲事官以懲其報會死之誤崔公更嚴檄諸將急攻毋爲賊誘諸將愈人人畏罪會璘前受計於公支公及直指王公檄責竟以一旅之師掃九股苗開路進兵而中丞江公以撫偏沅臨鎮復與公及支公計合遂連破長坎馬瑙青龍三囤所向無前公與郭公操縱水西直指宋公并嚴檄諸將吏使水西大敗賊於母氏囤殲虎翼以寒賊膽而應祥又以招撫爲進攻連破諸囤入三渡關抵白田壩與璘俱集囤下護軍張君等遵公指授會五總兵督各路副參遊守暨宣慰等輪日協攻先之以縉及應祥繼之以

# 江北廳志

## 卷七

### 藝文 碑記

一十二

重慶中西鉛石印局代印

璘及廣所將兵攻其後折枝孔英督各漢土兵攻其前以六月初五日縉等前後夾攻破其二城初六日廣及璘協攻而六路兵亦爭先以雲梯攀援而上逆賊橫梁四顧無一死黨計無復之始雉經而死廣兵及各路兵於烈焰中取酋屍一軀兼縛田氏朝棟兆龍等而巨黨何漢良田一鵬孫時太馬千駟等一一面縛賊遂無噍類矣是役也獲大賊首一生擒賊首一千二百餘名斬級二萬二千六百計俘獲賊屬五千五百計招降男婦十二萬六千計全獲被擄男婦一千計拓地千餘里公露布以聞獻俘京師上大說以平播功告廟百官畢賀斬朝棟等於市已頒詔海內及巡按御史公勘報續制府中丞列鎮監司而下論功爵賞有差初播州故爲漢唐郡縣自乾符間陷於南詔楊端取而據之遂爲獮穴公議改土設流爲府二州一縣八衛一特請於上易府名遵義平越列雉爲城設總兵憲使坐鎮之仍設學置博士弟子員於是修文偃武綏輯遐毗仁懷眞州之間稱一都會焉夫西南諸彝盤據於萬峯疊嶺中綏之則怒臂吠聲毒我邊疆討之則據險憑寨踉蹌而鬪敗則豕奔鼠竄窮蒐曠日故自古用兵未有甚得志者無論麓川之役罪人竟漏天











人修人事之和也

官濟橋碑記

安邦 給事中  
邑人

橋以濟名通往來也濟以官繫有三義焉一示地也二示公也三示重也示地者何地屬官壩蹊截官道每春夏水漲近居官壩者不得出遠由官道者不得入惟橋則可免此阨矣示公者何創義於郡邑大夫協力於縉紳士庶責成於吾憲張公以平治道途而建橋之謀始定儲費於舊令尹練公以平道夫役而給橋之用始足豈私便為哉示重者何橋去郡治僅二十里通南北諸路有不可計故捨舟由萬梁而入者必經此橋持節取通巴而按吾渝者亦經此橋首望合陽臂牽鄰水獨曰官者蓋舉重而言民庶在其中矣識此三義則橋石雄峙鬼神為之呵護天地與同悠久也與哉若夫錢穀之費用官民之姓氏則總裁諸后辭不贅云

野豬巖修路記

陳計長

巴城之東越銅鑼峽有古灘城為巴子置津處名野豬巖渡法人行岸上止以空船渡因

江北廳志

卷七 藝文記

一二十六

慶重中西鉛石印局代印

江水觸巖洶湧異常不得不奔趨於岸以據舟患兼以灘巖壁立路僅一綫縮首蹲身下視則萬頃湍流驚波震耳行者苦之余母文恭人身經其處歎曰幽閨之人誰知履險之危有如此者稍失足則魚腹矣與舟無異也若使鳩工修除令窄隘者稍寬險峭者稍平約費百金此功可竣我何惜簪珥而不為道路少舒其厄於是命匠鑿補未及一月而工成行者稱便命計長為記勒石時崇禎乙亥中元日也

桶井觀音寺碑記

天啓五年

王應熊

乘門寶峯者諱了文陳孝廉後裔也為人儻蕩負大節不事教飛錫遊名山者念有餘年春秋高矣倦遊知還有所積長物欲他屬不忍無所屬又廢敷歷之功乃求田十餘畝補葺兩廊僧舍佛殿者二環山門垣牆數十丈復自嘆曰一田耳擅為已有私心近貪推為人有雄心近痴等弊也一居宅耳出者客之目為傳舍入者主之據為巢穴等弊也一殿廡耳事久盡壞木久蠹蠹安居享以為利傾圯聽其為害等弊也獨不可輕乎於是商族人詣檀越謀永為香火計僉曰善以告不佞不佞退而深惟其故文上人不以損知益愚



累法衆則求壽世不磨乃爾蓋上人締構於身貽守於後行者館居者祝誰非上人衣鉢而令聞長世不較多乎償蕩負大節率類是此舉也寶峯剎傳世之業唯族人襄順其美唯法衆力贊其成有不若於訓而潰盟者人神共殲之

皇清

泊皈山爲寺僧輿若記

四川學使宋衡  
嵩南廬江

歲在丙戌余奉

命督學西蜀試省會按臨南川嘉眉諸郡丁亥三月驚聞內憂買舟奔里夏五抵渝江漲阻不得行進泊皈山渝守陳公邀登山寺寺幽勝髣髴太行白雲余揮涕焉殿左一室顏曰吾廬卽陳公捐建息靜處假坐其中雨益苦時總戎韓公分巡董公更顧我盤桓數日寺僧輿若乘暇索余爲記余棘人不耐文事及詢僧貽末始知僧本歙人洪姓厥考諱正昌號善甫有明進士官叙州司理獻賊陷城闔室殉難僧年甫十一從水洞逸出走黔滇復返叙渝伶仃無親識悲愴世事迺投佛晤師祝髮滄桑頓易綿邈河山悵望故鄉隱恫骨

江北廳志

卷七

藝文記

二十七

重慶中西鉛石印局代印

肉盡成空相泡影矣今

上御極之七年蠻煙盡靖海內宴如僧乃住錫皈峯苦行其間鶴髮丹顏道往事如昨日僧蓋勘破半生公案無事於身外求參者也爰記其概投筆登舟而去

天成橋百字碑記

潮州太守龍爲霖  
鶴坪

邑西黑水灘河每夏秋暴漲行者病焉衆議建橋長可十七丈有奇廣二丈高增二焉厥費不貲懼其未易成也竟告成功始癸亥二月竣甲子三月約糜金錢千五百貫人力也殆有天焉顏之曰天成屬余誌其歲月梗概如此董事暨捐金姓名刻之碑陰不贅

體仁會緣起

乾隆五年

周開豐

人與我非漠不相關者也故博濟雖聖人猶病而立達則人有同情善乎聖人近譬之說簡而切約而精也蓋近譬則人已無閒彼此可通卽不必損已益人而此心不刻况士苟存心利物於人必有所濟正不至虛談道學而行同楊子也周禮六行任恤在焉顧用之當否何如耳二氏之宮極力莊嚴已囊不足且呼將伯而親故艱難視如秦越又其甚者



趨貢於勢要之門消散於淫佚之地但有人焉向之稱貸則面赤迅謝惟恐去之不速噫世風至此尙有體仁者之心行強恕之事以利濟爲懷者哉而諸君子慨然興起以爲人有緩急思濟同然量已之力體仁之事何不可爲者因各捐已貲創舉斯會每月人各一金歸公營運三年合本息而計之共若干金擇會中公謹才幹者司其總而衆佐之來告者優卹以去顧念善士多端財力有限汎爲之知不能繼乃謀擇其外可周人急而內可紓已力者先試行之將來大裕則又加焉噫世風不可問久矣諸君子乃慨然興起剏茲善事是不亦仁心爲質而有當於近譬之旨乎乃諸君子方歉歉不自滿而思得一大善長者彌綸世界之缺而已會附之是雖諸君子樂善之盛心然人人而濟原有不能但得此會永永相續創始者勉圖厥終繼起者益宏其緒則惠亦溥矣大善長者可作是想亦不必作是想也

體仁堂碑記

乾隆六年

郡守李厚望

嘗讀禮至埋齒掩骼之文未始不歎行仁多術而茲亦其體仁之一端也程伊川云一介

# 江北廳志

## 卷七

藝文 碑記

一二十八

重慶中西鉛石印局代印

之士苟存心於愛物於人必有所濟獨怪世之矜言利濟者於共見共聞足以致聲稱獵名譽不惜傾囊橐攘臂仔肩至聽睹不及不難隔膜視之人亦無從施其責備此風俗之偷也渝郡地處下游爲三江總匯河流迅激春漲舟沉民人遭厄梗漂萍浮所在多有痼瘵念切者盡然傷之乾隆辛酉歲邑貢士韓希簡倡爲義舉捐貲建會一時人士鼓舞贊襄田宅孳生用贍經費購覓江北隙地爲漏澤召募淳謹輩厚其廩給旦暮周覽河干昇榘斂瘞無令下飽魚鼈上觸星光甚盛舉也邑令縷詳上達展卷之餘欣喜逾望深幸其有合於禮經之旨且符乎周文澤枯之意行見祥風善氣洋溢幽關於以仰副

聖天子化民成俗之治匪淺渺矣因亟爲之記俾勝事有成并爲都人士勸焉

體仁堂善會記

石韞玉

重慶太守

重慶爲古渝州地當蜀都下游三巴之鎖鑰百川之閩尾也其在西南諸水自松潘來者曰岷江自洪雅來者曰青衣江自越駕來者曰陽江自滇來者曰金沙江自永寧來者曰清水河自金堂來者曰簡河諸水自西南而下注皆入於大江而經過重慶之左其西北



諸水自略陽來者曰嘉陵江自龍安來者曰潼川自綏定來者曰渠河諸水由西北而下注皆滙於合州而繞出重慶之右兩江既合越忠萬而東出夔門以入楚故在下游者若楚若皖若江若浙若閩若粵皆溯流而上至重慶而分其在上游者若秦若黔若滇皆沿流而下至重慶而合凡夫商賈之所懋遷仕宦之所執掌魚鹽金木之所轉運羈人旅客之所經臨千艫萬艘輻輳於渝城之下歲不知其凡幾也自暑徂秋大雨時行江水漲溢風濤浩然舟中稍有不戒檣傾楫摧其遭陽侯之厄而從彭咸之居者不可勝計矣渝郡舊有體仁堂蓋邦人之好善者積金募夫收葬江中無主之尸誠善果也而相沿歲久司事者視爲具文經費入絀名存實廢所謂徒善不足以爲政矣吾友馬君軼凡捐金倡議領袖其事觀察嚴筠亭先生共分俸助之郡人聞風而起踴躍樂輸共得金若干兩交紳士唐燦然等置屋出債歲可收息錢若干以充其用將立章程勒石垂諸永久而乞余爲記竊惟掩骼埋胔王制所先四海九州之人誰非同胞共與而忍視其葬於魚鼈之腹而不顧乎余嘉馬君斯舉有合於古人澤及枯骨之義而又喜邦人士之樂善好輸相與有

## 江北廳志

### 卷七

藝文記

一十九

重慶中西鉛石印局代印

成也故不憚濡筆而爲之記

#### 游華鑿山記

周開豐

華鑿山去郡城西三日程佛書祀普賢大士庚寅春初治裝往遊以初八日渡內江宿磨子溪夜大雨及明雨止初十日天霽至晏家壩始人箐山骨皴裂喬木陰翳仰而視之惟見碎天溪水潺潺咽於危橋細棧之下時逗微風潏潏浪穀乃知風姨機杼正不亞於天孫也苔翠濕衣尤多南竺子紅纍纍如珊瑚珠幽秀撩人遠勝前此風味矣暮抵秦家場大寒謂是山深自爾天明啓戶則銀色世界不異峨眉於是偕老僕拖竹杖出入瑤山琪樹間巾履皆白叢樹深林古藤糾結或如老龍或如盤蛇或窮起而如橋或驚擎而忽掣青苔延緣於上樹枝有已折者苔鬚以一線綴之數點雪花因隙來附最愜人意然後游興大暢焉山甚高自晨逮禺中乃畢登入寺禮佛則盜劫而僧逃蓋郡邑之內禁令之下常有聲焉荒山孤寺寧待言哉假使泥佛可用亦不知何時捨身爲贈矣嗟夫嗟夫登樓而望雪光幌漾沁骨裂眦咫尺之外皆重霧不啻洪濛未開時天寒寺寂客不能留相牽



而下稍聞此山亦有聖燈及南堂佳勝不復去暮抵前宿家擁爐茗話一夜大雨明晨束裝自負杜鵑花數樹三宿而反天乃大晴是行也道可四百數十里往反七日得詩六首

### 創修江北城記

高學濂

江北爲唐北府地居東川之上游作渝州之保障舊城不知圯於何代嘉慶三年教匪跳梁流賊竄至鴛鴦橋距廳治二十餘里居民扶老攜幼夜渡嘉陵江覆溺無算於是築土城以衛之道光癸巳余權廳篆土城亦傾圯無存創修之任余敢諉焉憶余宰巴縣時稔知候選訓導黃君雲衢品端學博素爲鄉里所推重延之來而告之故黃君深以爲然出語都人士諸紳耆皆踴躍樂輸不一月得萬餘金鳩工鑿石擇吉興工適余以卓薦擢資州匆匆北上不獲視其成 福潤田司馬回任後踵其事而董勸之乃於今三月告竣都人士走書幣丐予記其巔末喟然曰凡事易於謀始難於圖成是役也計周五里餘用銀三萬八千五百兩有奇閱十九月而蒞事工程可謂大矣民力可謂竭矣藉非 潤田司馬培養有年豈能勞而不怨抑非董事諸君子實心實力又烏能取信於人而踴躍輸

## 江北廳志

### 卷七

藝文記

三十

重慶中西鉛石印局代印

將爭先恐後哉議雖始於予予敢貪人之功爲已力哉則試登高以望西漢之水南匯岷江塗山峙其前浮圖拱其後氣聚而水環行見鳳翥蛟騰人文蔚起矣豈特苞桑鞏固勢成犄角作渝州千秋保障已哉黃君雲衢等始終其事例得並書時道光十五年歲在乙未孟夏月前署江北同知資州事無爲高學濂記

### 創修江北城記

福潤田

江北幅幘廣闊民殷土沃城屬居民屋舍星羅棋布且以瀘臨大江與渝城接壤唇齒相依互爲犄角乃自分疆以來獨於城垣未建嘉慶二三年教匪蹂躪僅權一時之計修築土城迄今傾圯無存士民等無力建修歷任司牧亦因修費乏資無從籌欸未經議及嗣於嘉慶十五年請增設學道光二年復請設汎學校維新防汎有備諸臻美善而獨於城垣需費浩大未遽議修亦一恨事也 予蒞任斯土久欲籌資捐修亦因工程浩繁經理未得其人旋因移署綏郡未獲舉行隨值高刺史接署斯篆於癸巳仲秋爰集紳耆籌議勸諭闔屬糧戶一體捐助興修選舉公正紳耆設局經收甫經倡議旋即卸篆 予奉檄回任



踵司其事復爲出示勸捐設局經收督工分段修建予首先倡捐銀一千兩交局支用以示激勸隨據各紳民情殷急公爭先恐後踴躍輸將而在局各首事亦復不憚勞瘁盡心經理茲於乙未歲春三月工始告竣核計共費銀三萬八千五百一十一兩零六分四釐悉出紳民捐助始得成茲盛舉伏以江北界分巴疆地隸重屬銅鑼三峽扼險其前浮圖一關拱列於後右踞塗山左臨江岸形勢險峻氣象崢嶸茲建雉以相維斯苞桑之永固從此藩籬有備保障足資爾等人民壽域同登戶有倉箱之慶春臺共躋家無刁斗之驚策出長治久安基建千秋萬載予與爾民人等共有攸賴焉爰勒碑石以垂久遠是爲序

培修學宮記

福珠朗阿 潤田

廳自嘉慶十五年設立專學後十六年士民等捐輸修建學宮戊子春余來牧是邦因謁廟見其地局勢宏敞氣象崢嶸獨惜其創建之初登泮池於櫺星門內而宮牆壅蔽氣勢鬱而不舒牆以外率皆零星小戶雜穢不堪故自分學以來登賢書者寥寥無幾久欲闢而易之而所費不貲輒復中止丙申春學博宋蔚堂來廳秉鐸亦爲余言及之余終有

江北廳志

卷七 藝文記

三十一

重慶中西鉛石印局代印

志而未逮也戊辰奉札守綏權篆瀘州適值省城添修號舍檄各屬勸捐幫費而廳屬輸項獨多學博宋因以余志述諸署牧王植三卽以次年二月鳩工興事甫經始而余適捧檄回任余見之喜曰是余志也因愆惠亟成之於是鑿泮池於櫺星門外週以石欄護以宮牆外砌短垣使收潮而取勢兩廡簷柱之不中程度者盡從而易之其他缺者補之舊者新之甫五月而工竣用銀九百八十六兩有奇輪奐不易丹雘一新向之壅蔽者今則開爽矣向之蕪穢者今則宏麗矣則試登戟門而遠望塗山卓立於當前江水廻環於左右擷芳搗秀襟抱朗開洵文林之大觀也是歲適當大比歌鹿鳴者朱子光燦黃子善用庚子王子大鑑段子賡堯復聯翩步武武闈中三十餘年無人獲雋而是科劉九思亦遂報捷癸卯汪先煥復登賢書形家之言亦未可不盡信也今則文風日盛士氣倍隆後之歌鹿鳴遊翰院者不知凡幾諸生但相與著祖鞭策驥足則鵬程九萬雲路三千吾將拭目而見其搏風直上也是役也學博宋蔚堂奉命督工不避炎熱日與首士顏思恭熊賦林李赤亭黃綬書黃襄訓王志喬等始終其事例得並書



建修文昌宮碑記

黃雲衢

天下事有一舉而兩全者有一舉而三善者惟在因乎時乘乎勢主治者有人贊襄者得人處之以公行之以敏濟之以和斯不難尅期而呈效吾邑文昌宮舊建弋陽觀側基址雖高棟宇僻陋不足以妥 神聖而肅觀瞻道光十三年創修城垣三載告竣尙存銀五千餘兩衆議請建文昌宮更諸爽塏適值叙府峨邊不靖軍務旁午福憲命將銀四千餘兩赴省襄入軍費餘銀千兩覓得閩人劉鄧二姓所買盧氏住宅基址經營甫就後用不敷仁憲示諭募捐先輸養廉五百兩三里士民景風慕義慷慨赴公共積銀七千餘兩由是命匠鳩工程材効技土木金石各有典司上則崇聖三間刊層平堂設砌厓隙峻路啓扉棧齟嶸險其正殿體象天地經緯陰陽筭棟布列棟宇高曠羅疏柱之汨越光豔朗以景彰下則抱廳五柱長與殿齊華表崔巍高拂雲霓桁梧複疊勢合形離爰有禁扁勒分翼張承以陽馬接以圓方左右兩廊直逮樂樓連延逶迤枝蔓相糾瓦縫參差簷牙高啄各地地勢鈎心鬪角廊下考棚列爲四層坐號整肅容千餘人外則三門聳峙啓閉以時

江北廳志

卷七

藝文 碑記

三十一

重慶中西鉛石印局代印

更樹大門左右置屋考試諸生以避風雨計甚周也其下基址開朗後貌猙獰於階前奎閣分峙於左右周以垣墉塗以丹雘奢不爲靡儉而中度約計費銀九千餘兩不踰期年遂藏厥事都人士來觀者咸嘖嘖稱道謂渝北曩日興工動衆糜費不貲稽延時日屢覺艱難茲何若是之易也不知 福憲以至公之心行至公之事爲我士民建廟興學闡神教而振文風凡襄事者亦惟各體此意同心協力罔敢憚勞故耳而識者爲之說曰斯舉也公以服衆衆無不悅敏以圖功功無不成和以集事事無不濟以之定大策決大疑經理國家平定海宇無難矣斯役其小者也爰勒諸石願以告當世之制事者

創修鹿鳴義學碑記

南川 周立模 桐村 拔貢

江北魚鎮廳東一繁會所也其地山明水秀故子弟多雅秀而文絃誦之聲所在皆是予曩者曾履其地與其鄉之樂善諸君子遊頗稱莫逆庚寅冬承鄉人聘主講鹿鳴義學比到館見其上棟下宇宏模壯觀與臥龍伏獅諸勝相鼎峙負笈來遊者踵相接彬彬皆禮樂士固知其所以致此者非偶然也越翼日明經楊文升之父楊蔚然者以興建義學碑



記囑予且錄其節略以示予曰義學始於道光五年乙酉冬月奉 大憲札諭廣設鄉學以宏教育於以仰副

聖天子化民成俗之意務使海隅徼寒莫不家誦戶絃則風俗自淳身等卽於是年會集里中紳耆及一甲糧戶等量力捐輸共成厥美一時聞者欣喜趨事維殷於是或捐學基或捐產業以爲學費未逾兩月而學田學俸悉皆裕如六年春於黃姓所捐地基內有瓦房五間買作學舍復增大其制繚以牆垣加之黜聖於是乎堂構一新顏之曰鹿鳴義學蓋欲爲科第先聲有取乎賓興之義焉耳七年復增建下舍其崇宏壯麗視上舍有加焉又置蒙館於義學之東南隅俾竹馬鳩車之輩亦得習於禮教凡吾之經營於茲事者蓋六閱寒暑矣敢煩大筆一記其巔末焉予曰如君所錄原委瞭如指掌義學已有記矣夫何贅旣而思之鄉學固爲科名嚆矢然士先器識而後文藝德行本也文藝末也本之不立文將焉附苟大節有虧微論名之不顯卽令飛黃騰踏早掇巍科是亦名教罪人而不爲鄉黨所齒可勝惜哉

江北廳志

卷七

藝文 碑記

三十二

重慶中西鉛石印局代印

聖天子崇儒重道曲成不遺之志意在此不在彼後之來學者當體此意毋蹈虛聲教子弟者尤當知所先也楊君曰唯唯爰點定其文而爲之記楊君又於義學之左偏土坡公地內作爲義塚與義學基址相附麗因縷及之至於捐貲姓氏學中規額與夫每歲入出之數例得附載識於碑陰是爲記

靜觀寺重塑天王神像記

乾隆十七年

聶森

天王之稱不知始於何時昉以誰氏無何有之屬信信不如疑疑也而必摹爲像且工以圖以儒崇道豈其醜乎然有說焉人之心一而已信儒者此心信道者亦此心以信道者悚此心以堅信儒敬之所以直內也義之所以方外也禮里靜觀寺三殿上肅以梵王旁置大天王四座蓋肇自明洪熙年間以迄於今閱時久且多難遽指數矣天王之像寢舊欲圯鄉之人觸目警心常深太息然未有鳩集衆緣共勦盛舉者丙寅春聶大簡聶大笙等乃約募閭黨信善聚腋成裘置座塑像越次年秋始落成而天王之座與像煥然一新矣夫人之心無久放不懾之時一觸神聖更無不改容肅志今見此莊嚴聖像其有跋胡



寔尾者歟抑有可通微合漠者歟入廟思敬不必天王之果有而亦不必其無也卽此爲信道則心以道悚信由儒堅安見道之果異於儒哉里之中直其正方其義思過半矣爰爲之序以誌不朽

重修寸灘觀音閣記

袁文明

資陽教諭

粵稽鷲嶺鷄園開梵刹之始招提蘭若立叢林之宗天下名勝半棲瞿曇而廟貌廢興之際莫不由人事也蓋其興也必有好善檀越倡於前其廢也必有不肖錙流敗於後至若廢而復興非借衆擎未易舉也渝水之北距郡十五里許有鎮名寸灘有寺名鎮江由寺而左仄徑嶽嶽危石壁立土微平處舊有小閣遺址尙在傍巖作龕塑白衣大士一尊俯瞰大江面對塗山莊嚴妙麗神致欲生令瞻禮者如遊南海普陀親見慈雲甘露眞鬼斧神工也第碑誌磨滅不知創自何時遍尋之惟存前明神廟年號又爲風雨剝蝕亦莫可深考吁蓋其廢也久矣然今之碎瓦頽垣昔之峻宇雕牆也今之荒蕪蔓草昔之瓊甍玉樹也今之鬼燐螢火昔之銀缸華燭也今之苔蘚黧黹昔之金碧輝煌也世不乏好善之

江北廳志

卷七

藝文記

三十四

重慶中西鉛石印局代印

士可令其終廢哉歲庚寅閩邑衆姓捐貲重修鳩工庀材晨夜展力依巖立閣鑿石爲門其象更新其製彌樸缺者補之殘者葺之越辛卯告成方諸鹿苑精舍固不逮其然亦一方之金繩寶筏也則由廢而興雖曰靈蹟不終湮乎而士庶樂善之誠蓋亦有足多者噫大士之靈感在天下若水之在地中無所往而不在也何以閣著然神所憑依將以肅觀瞻而牛敬畏古聖王神道設教此物此志也夫抑內典載大士現身說法或男或女無非誘人爲善也恆河沙大衆誠能作如是觀化其桀驁殘忍之性養其慈祥愷悌之心體五常敦六行爲臣祝君爲子祝父不徒匍伏蓮臺求福遂已則是閣之重修其有功於世道人心者豈淺鮮哉若但聚衆焚香依佛托鉢舉國若狂徒增淫祀匪特爲大士羞抑亦爲當事之憂余重僧請收略陳斯閣興廢梗概而爲之記

建修嘉陵書院碑記

前任同知 翟鳳翔

皇上御極之元年余奉

命來視此邦下車之始欲以振興文教爲先務適孝廉周吉卿先生主講書院課士克勤講義



闡程朱之蘊來學者日以衆時相過從其策勵諸生之意與予有同心焉因言江北自嘉慶十六年始立學校前在乾隆二十三年分治之初藉魯班廟芭蕉石櫻桃溪等處佃租設立義學自嘉慶十一年前任張司馬鑑湖因義學不足以興文教訪購熊姓住房捐膏火獎賞訓課生童於其中特名曰嘉陵書院既而勸三里紳士耆民公捐置南京寺田地一坵按田收租每歲膏火束修俱取給於是亦太減矣士民中有好義者或捐施田舍以資公費或因雀角鼠牙捨田屋於書院以取租集腋成裘日有起色嘉慶二十年另買全補愚房屋改爲書院前所爲書院者見置學宮斯舉也張司馬鑑湖創造於始除捐給膏火外復自捐銀一千兩米司馬鶴年勸紳士募化贊成其事余聞之慨然曰一介之士苟存心於利物於世亦必有濟况職司民牧果能興教化使境內之民懦立頑廉敦詩說禮庶無負

簡畀之恩而無尸位素餐之羞書院之設其卽振興文教之大端乎夫天下事莫爲之前雖美弗彰莫爲之後雖盛弗傳予深慕前任數君子經營締造之苦心而尤望後之人踵而行

江北廳志

卷七

藝文記

三十五

重慶中西鉛石印局代印

之使文風蒸蒸日上不至有青矜之刺也則幸甚是爲記